

Visoki predstavnik smatra da bojkot Stalnog komiteta za vojna pitanja od strane RS predstavlja nazadovanje u provedbi Daytonu

Visoki predstavnik, Wolfgang Petritsch, uputio je pismo Živku Radišiću, članu Predsjedništva iz reda srpskog naroda, i Miloradu Dodiku, premijeru RS, u kojem izražava ozbiljnu zabrinutost međunarodne zajednice povodom bojkota Stalnog komiteta za vojna pitanja (SCMM) od strane RS.

Večeras će se Visoki predstavnik te ambasador Robert Barry, šef misije OSCE u Bosni i Hercegovini, i general Montgomery Meigs, komandant SFOR-a, sastati sa predstavnicima nadležnih organa RS da bi riješili ovo pitanje.

Stalni komitet za vojna pitanja (SCMM), kao jedna od zajedničkih institucija Bosne i Hercegovine, ima vitalan značaj za osiguranje mira u zemlji. Sastanci Stalnog komiteta se održavaju svakog mjeseca radi koordinacije pitanja iz domena odbrane i mjera za izgradnju povjerenja između oružanih snaga u Bosni i Hercegovini.

Visoki predstavnik smatra da bojkot sastanka zakazanog za 8. septembar, koji je doveo do njegovog otkazivanja, predstavlja ozbiljno nazadovanje u pomacima postignutim od potpisivanja Daytonskog mirovnog sporazuma, što stvara sliku da RS opstruira mirovni proces.

Visoki predstavnik se iskreno nada da će nadležni organi RS odmah prekinuti ovaj nesmotreni bojkot i nastaviti da učestvuju u važnom radu SCMM-a.